

COMISIÓN INFORMATIVA DE TURISMO, TERMALISMO E MEDIO AMBIENTE

ACTA da mencionada comisión informativa, correspondente ao día **19 de outubro de 2023**

Ás 17.08 horas do día 19 de outubro de 2023, réunese a Comisión Informativa de Turismo, Termalismo e Medio Ambiente, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

Presidente: D. Luís Menor Pérez

Deputados/as do Grupo Popular:

D. Jorge Pumar Tesouro

D.^a Marta Nóvoa Iglesias

D.^a Patricia Torres Madureira

D.^a M.^a del Carmen González Quintela

D.^a Teresa Barge Bello

Deputados/as do Grupo Socialista:

D. Álvaro Vila Araújo

D.^a Susana Rodríguez Estévez

D. Aurenitno Alonso Araújo

D.^a Marina Vaz Quintillán

Deputados de Democracia Ourensana:

D. Armando Ojea Bouzo

D. Gonzalo Pérez Jácome

Deputados/as do BNG:

D.^a María José Mangane Guede

D. Xosé Manuel Puga González

Secretario: D. Adamantino Barreiro García

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á DO DÍA 21 DE SETEMBRO DE 2023.-

A Secretaría Xeral deu traslado do borrador da acta da sesión anterior, correspondente á ordinaria do día 21 de setembro de 2023.

Non se producen intervencións e, por unanimidade, a comisión adopta o seguinte acordo:

Aprobar a acta da sesión ordinaria da Comisión Informativa de Turismo, Termalismo e Medio Ambiente do día 21 de setembro de 2023, conforme co borrador elaborado pola Secretaría Xeral.

2º.-ORDENANZA REGULADORA DO SERVIZO PÚBLICO SUPRAMUNICIPAL DE RECOLLIDA E TRATAMENTO DE RESIDUOS INDUSTRIAIS NON PERIGOSOS E ESPECIAIS.-

D.^a Marta Nóvoa Iglesias, do Grupo Popular, indica que se trata de aprobar a Ordenanza reguladora do servizo público supramunicipal de recollida e tratamento de residuos industriais non perigosos e especiais. Engade que hai que poñer en marcha un sistema de prevención medioambiental e de recollida de residuos nas zonas industriais de Ourense, especialmente no polígono de San Cibrao das Viñas, polígono Barreiros, O Pereiro de Aguiar e a zona industrial de Seixalbo. No polígono temos unhas instalacións para facer a recollida dos que queiran levar alí ou facelo porta a porta, que demandan os empresarios da contorna industrial de Ourense. Na ordenanza recóllese o tipo de residuos e na prestación patrimonial, recóllese a parte fiscal.

D.^a María Vaz Quintillan, do Grupo Socialista, pregunta se o servizo se vai prestar de forma directa pola Deputación ou de forma indirecta por unha empresa externa. Pide que se aclare a zona prioritaria, que sería o Polígono Industrial de San Cibrao, o parque empresarial de O Pereiro de Aguiar, e a zona comercial de Barreiros, e a zona non prioritaria e pregunta porque non se inclúen outras zonas do resto da provincia como os polígonos de Xinzo, Verín, Valdeorras, O Carballiño e cal é o criterio da ordenanza para que unha zona sexa prioritaria ou non, e se esa diferenciación na ordenanza ten algún beneficio fiscal. Tamén indica, respecto aos pagos polo desprazamento dos residuos, que lles parece discriminatorio, cando estamos a falar de discriminación positiva do rural, que os custos para pequenas empresas de Verín, O Barco, que están a moita máis distancia, se multipliquen pola distancia ao centro de recollida. Se pretendemos fixar poboación nestas zonas máis despoboadas, deberíamos

practicar políticas que favorezan a industrialización destas zonas e non castigalas sempre aumentando as taxas que teñen que pagar estas industrias por encontrarse en zonas máis afastadas.

D.^a Marta Nóvoa Iglesias, do Grupo Popular, responde que moitas destas cuestións ten que velas con calma porque non ten datos aquí diante. A idea é un centro que está instalado no polígono industrial de San Cibrao das Viñas. Desde a perspectiva medioambiental e de recollida de residuos, entende que comparten a idea de que non se pode circular os residuos por toda a provincia de Ourense. Aínda que poden traerse residuos doutros lados, a idea é que sexa para a contorna onde está situado o Centro Verde (no polígono de San Cibrao). Como Deputación destaca que imos ser pioneiros en poñer en marcha un sistema deste tipo no polígono de San Cibrao, e se hai demanda en zonas industriais máis afastadas, haberá que propoñer outro centro nesas zonas. Indica que non está decidida a forma de xestión directa ou indirecta. Di que non ten lóxica que se recolla dende aquí aos polígonos do Barco ou Xinzo. A perspectiva non é circular os residuos por toda a provincia. É discutible o custo do servizo, pero é da parte fiscal, que é do seguinte punto, pero a idea é que o que está máis preto custe menos. Iremos vendo que se pode facer cara outras zonas da provincia de Ourense.

Non se producen máis intervencións e co voto favorable do Grupo Popular (6) e de DO (2) e a reserva de voto do Grupo Socialista (4) e do BNG (2), a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente a Ordenanza reguladora do servizo público supramunicipal de recollida e tratamento de residuos industriais non perigosos e especiais, co seguinte contido:

Título preliminar: Disposicións xerais

Artigo 1. Obxecto, fundamento e ámbito territorial

1. Constitúe o obxecto da presente ordenanza a regulación do servizo público supramunicipal de recollida e tratamento de residuos industriais non perigosos e especiais.

2. Este servizo público é de titularidade provincial cuxa ordenación e xestión correspóndelle á Deputación Provincial de Ourense por competencia propia adquirida no pleno do 30 de maio de 2014 e trala cesión do centro verde propiedade do concello de San Cibrao das Viñas, a esta administración o 27 de novembro de 2014.

3. O servizo público supramunicipal de recollida e tratamento de residuos industriais non perigosos e especiais da Deputación Provincial de Ourense, comprende a:

- a) Recepción no centro verde de residuos de orixe industrial de tipo non perigoso e especial, producidos dentro do ámbito territorial desta ordenanza.
- b) Recollida e recepción “*porta a porta*”, por persoal autorizado do servizo, nas industrias e empresas dos produtores de residuos de orixe industrial de tipo non perigoso ou especial, producidos dentro do ámbito territorial desta ordenanza.

4. O servizo de recepción no centro verde, préstase mediante a explotación da dita instalación, localizado no Polígono de San Cibrao, vía 4, coordenadas UTM (Fuso T29) (DATUM ETRS89) X= 597.333,63 m e Y= 4.682.200,02 m.

5. O servizo de recollida e recepción “*porta a porta*”, nas industrias ou empresas dos produtores, prestarase mediante un vehículo ou persoal autorizado.

6. O ámbito territorial de aplicación desta ordenanza é para os residuos industriais non perigosos e especiais, de industrias ou actividades localizadas na provincia de Ourense, incluíndo dúas áreas principais, a primeira, denominada “**zona prioritaria**” abarcando o Polígono Industrial de San Cibrao, o Parque Empresarial do Pereiro de Aguiar e a Zona Comercial Barreiros e a segunda, nomeada “**zona non prioritaria**” para todas aquelas zonas territoriais que estean fora da antedita, como son as que se sitúan noutras zonas do municipio de San Cibrao das Viñas ou aquelas próximas á zona industrial de Seixalbo (no municipio de Ourense), incluso na bisbarra da cidade de Ourense.

7. Os residuos industriais non perigosos e especiais permitidos neste centro verde, recóllense no Anexo I desta ordenanza.

Título I

Das prestacións do servizo

Artigo 2. Da prestación da recepción dos residuos industriais non perigosos e especiais admisibles no centro verde

1. A recepción dos residuos será a solicitude da persoa interesada e terán condición de usuarias deste servizo todas as persoas físicas, xurídicas ou outras entidades que directa ou indirectamente entreguen residuos (catalogados como aceptables) nestas instalacións (centro

verde), é dicir, calquera produtor ou posuidor de residuos industriais non perigosos e especiais que, directamente ou indirectamente, fagan entrega deles nas instalacións.

2. No momento de realizar a entrega dos residuos no centro verde, a persoa cedente deberá proporcionar a seguinte información, e no seu caso presentar a seguinte documentación:

- Razón social da empresa que entrega o residuo
- Matrícula do transporte no caso de realizarse entrega no centro verde
- Persoa propietaria e teléfono de contacto
- Tipo (código LER) e volume de residuos
- Autorización ambiental que corresponda segundo a normativa que lle sexa de aplicación en cada caso

3. A recepción dos residuos quedará regulada baixo a aplicación de prestacións patrimoniais non tributarias para cada tipoloxía dos residuos aceptados neste centro verde, recollidos no Anexo I desta ordenanza.

4. Considérase “residuo recepcionado” cando se cumpran todos os trámites esixidos nesta ordenanza reguladora, así como, cando estes sexan aceptados polo xestor do centro verde e consecuentemente, téñase liquidado a prestación patrimonial de carácter público non tributaria correspondente.

5. Así, a descarga ou abandono de calquera tipo de residuos, dentro ou fora da planta, sen os anteditos trámites de aceptación serán considerados como “residuos abandonados” e rexeranse segundo o disposto no artigo 108 de infraccións, da Lei 7/2022, do 8 de abril, de residuos e solos contaminados para unha economía circular.

6. En ningún caso, se recepcionarán residuos que non poidan ser clasificados/identificados dentro dalgunha das tipoloxías recollidas no Anexo I desta ordenanza, ou ben polo seu estado de conservación, pola invisibilidade do embalaxe, pola mestura con algún residuo non permitido ou prohibido, ou por calquera outro motivo.

7. A presenza de residuos perigosos, que se detecten no momento da recepción, suporán a non aceptación nin a entrada na planta. No caso de que non se detecten e aparezan mesturados posteriormente á recepción, serán almacenados nun contedor pechado con este destino para a entrega ao xestor autorizado, procedendo a tramitar pola administración o correspondente expediente sancionador, do que se poida derivar a aplicación de sanción económica así como a prohibición de uso deste servizo público.

Artigo 3. Da prestación da recollida e recepción de residuos “porta a porta” nas industrias ou empresas produtoras de residuos

1. A recollida e recepción dos residuos “porta a porta” será a solicitude da persoa interesada e terán condición de usuarias deste servizo todas as persoas físicas, xurídicas ou outras entidades que, de xeito directo ou indirecto, entreguen aqueles residuos clasificados como aceptados, ao persoal encargado de realizar esta recollida, é dicir, calquera produtor/a ou posuidor/a de residuos industriais non perigosos e especiais, que faga entrega deles ao transportista responsable deste servizo público supramunicipal de recollida e tratamento de residuos industriais non perigosos e especiais.

2. A recepción dos residuos quedará regulada baixo a aplicación das prestacións patrimoniais non tributarias, en función da localización da industria ou empresa á que se vaia a recoller os residuos, ou ben dentro da zona prioritaria ou pola contra na zona non prioritaria, definidas no artigo 1.5 desta ordenanza.

3. No momento de realizar a entrega dos residuos ao persoal do servizo de recollida e recepción “porta a porta”, a persoa cedente deberá proporcionar a seguinte información, e no seu caso presentar a seguinte documentación:

- Razón social da empresa que entrega o residuo
- Persoa propietaria e teléfono de contacto
- Tipo (código LER) e volume de residuos
- Autorización que corresponda segundo a normativa que lle sexa de aplicación en cada caso

4. Considérase “residuo recepcionado porta a porta” cando se cumpran todos os trámites esixidos nesta ordenanza reguladora, así como, cando estes sexan aceptados polo xestor do centro verde ou o transportista autorizado para a recollida, e consecuentemente, téñase liquidado a prestación patrimonial de carácter público non tributaria correspondente.

5. En ningún caso recolleranse residuos que non poidan ser clasificados/identificados dentro dalgunha das tipoloxías recollidas no Anexo I desta ordenanza, ben polo seu estado de conservación, a invisibilidade do embalaxe, a mestura con algún residuo non permitido e/ou prohibido ou ben, por calquera outro motivo.

6. A presenza de residuos perigosos, que se detecten no momento da recollida “*porta a porta*”, suporán a non aceptación e consecuentemente a non recollida. No caso de que non se detecten e aparezan mesturados posteriormente á recollida, serán almacenados nun contedor pechado con este destino para a entrega ao xestor autorizado, procedéndose a tramitar pola administración o correspondente expediente sancionador, do que se poida derivar a aplicación de sanción económica así como, a prohibición de uso deste servizo público.

Título II

Do réxime sancionador

Artigo 4. Infraccións

1. Considéranse infraccións as accións ou omisións que contraveñan o establecido na presente ordenanza así como aquelas outras que estean tipificadas na lexislación estatal ou autonómica, reguladora das materias que se inclúen, sen prexuízo do que os preceptos desta ordenanza poidan contribuír á súa identificación máis precisa.

2. As infraccións tipificadas na presente ordenanza clasifícanse en leves, graves e moi graves.

3. Serán infraccións moi graves:

- a) Exercicio de calquera actuación ou actividade dentro das instalacións, que poida supoñer dano ou deterioro ambiental.
- b) Exercicio de calquera manobra, actuación, acto vandálico ou actividade dentro das instalacións, que poida supoñer dano ou deterioro a dita instalación ou elemento anexo á propiedade.

- c) Obrigar ao persoal encargado da xestión do centro verde ou ao transportista á recepción de residuos non admisibles no centro verde, mediante extorsión, chantaxe, ameaza ou emprego de violencia física ou verbal.
 - d) Ocultar, mesturar ou incluír, dolosamente, residuos non admisibles, de tal xeito que sexa imposible detectalos durante a recepción, tanto no centro verde, como na recollida “*in-situ*”.
 - e) Desfacerse de residuos que poidan ser obxecto dalgunha proba xudicial, derivada dun acto delituoso ou susceptible de ter causado un dano ou deterioro no medio ambiente, ou posto en grave perigo a saúde das persoas.
 - f) Obstruír a actividade inspectora ou de control da Deputación Provincial de Ourense.
4. Serán infraccións graves:
- a) Obrigar ao persoal encargado da xestión do centro verde ou ao transportista á recepción gratuíta de residuos admisibles no centro verde, mediante extorsión, chantaxe, ameaza ou emprego de violencia física ou verbal.
 - b) Falsificar a documentación e datos esixidos sobre o produtor, o xestor e/ou os residuos que se entregan no centro verde ou na recollida “*in-situ*”.
 - c) A comisión dalgunha das infraccións indicadas no apartado anterior cando pola súa escasa entidade non mereza a clasificación de moi grave.
5. Serán infraccións leves:
- a) Obrigar ao persoal encargado da xestión do centro verde ou ao transportista á recepción gratuíta de residuos admisibles no centro verde, aínda sen empregar violencia física ou verbal.
 - b) A comisión dalgunha das infraccións indicadas no apartado anterior cando pola súa escasa entidade non mereza a clasificación de grave.

Artigo 5. Prescrición das infraccións.

1. As infraccións leves prescribirán ao ano, as graves aos tres anos e as moi graves aos cinco anos.
2. O prazo de prescrición das infraccións comezarase a contar desde o día en que a infracción se comete.

3. Nos supostos de infraccións continuadas, o prazo de prescrición comezará a contar desde o momento da finalización da actividade ou do último acto co que a infracción se consuma. No caso de que os feitos ou actividades constitutivos de infracción foran descoñecidos por carecer de signos externos, dito prazo computarase desde que estes se manifesten.

4. Interromperá a prescrición a iniciación, con coñecemento do interesado, do procedemento sancionador, continuando o prazo de prescrición se o expediente sancionador estivera paralizado durante máis dun mes por causa non imputable ao presunto responsable.

Artigo 6. Sancións

- a) No caso de infraccións moi graves: as multas oscilarán desde los 5.001,00 € ata os 15.000,00 €.
- b) No caso de infraccións graves: as multas oscilarán dende os 751,00 € ata os 5.000,00 €.
- c) No caso de infraccións leves: as multas serán ata os 750,00 €.

Artigo 7. Prescricións das sancións.

1. As sancións impostas pola comisión de infraccións leves prescribirán ao ano, as impostas por faltas graves aos tres anos e as impostas por faltas moi graves aos cinco anos.

2. O prazo de prescrición das sancións comezarase a contar dende o día seguinte a aquel en que adquira firmeza a resolución pola que se impón a sanción.

3. Interromperá a prescrición a iniciación, con coñecemento do interesado, do procedemento de execución, volvendo a transcorrer o prazo se aquel está paralizado durante máis dun mes por causa non imputable ao infractor.

Artigo 8. Publicidade das sancións

O Pleno poderá acordar a publicación, a través dos medios que considere oportunos, das sancións impostas pola comisión de infraccións graves e moi graves, unha vez que esta adquirira firmeza.

Artigo 9. Competencia e procedemento sancionador

1. Corresponde ao presidente da Deputación a resolución dos expedientes administrativos sancionadores no exercicio da competencia que lle é atribuída a tal fin polo artigo 21.1.n) da Lei 7/1985, de 2 de abril, reguladora das bases de réxime local.

2. A imposición de sancións e a exixencia de responsabilidades conforme a esta ordenanza levaranse a cabo de conformidade co previsto na Lei 39/2015, de 1 de outubro, do procedemento administrativo común das administracións públicas e segundo os principios establecidos na Lei 40/2015, de 1 de outubro, do réxime xurídico das administracións públicas e demais normativa que lle sexa de aplicación.

Artigo 10. Reparación do dano e indemnización.

Sen prexuízo da sanción que se poderá impor, a persoa infractora quedará obrigada á reposición da situación alterada nos supostos previstos no artigo 4.3.a) e b) desta ordenanza, así como a indemnización dos danos e prexuízos causados que deberá ser determinado polo órgano competente e trala tramitación do correspondente expediente no que, en todo caso, darase audiencia á persoa interesada. Este expediente poderá tramitarse de forma conxunta ou separadamente do de determinación da responsabilidade infractora.

Disposición final

Esta ordenanza entrará en vigor ao día seguinte da súa publicación íntegra no Boletín Oficial da Provincia, sempre que transcorrera o prazo previsto no artigo 65.2 da Lei 7/1985, do 2 de abril, reguladora das bases do réxime local.

Anexo I

Residuos permitidos e aceptados no Centro Verde

| CÓGIGO LER | RESIDUOS INDUSTRIAIS NON PERIGOSOS |
|-------------------|---|
| 20 01 38 | MADEIRAS |
| 20 01 01 | PAPEL |
| 20 01 01 | CARTÓN |
| 20 01 40 | CHATARRA |
| 20 01 11 | TEAS |
| 20 01 39 | PLÁSTICOS |
| 20 01 99 | OUTROS |
| 17 04 02 | ALUMINIO |
| varios | LODOS |
| – | PALETS |

| | |
|----------|----------------------------------|
| - | EMBALAXES DE CARÁCTER INDUSTRIAL |
| 20 01 02 | VIDRO |
| 10 01 | CINZAS |

| CÓDIGO LER | RESIDUOS INDUSTRIAIS DE CARÁCTER ESPECIAL |
|---------------|--|
| | SUBTIPO |
| 080111 | PINTURAS E VERNICES |
| 08 03 12 | TINTAS CON DISOLVENTE OU SUBSTANCIAS PERIGOSAS |
| 08 03 17 | RESIDUOS DE TÓNER DE IMPRESIÓN |
| 08 04 09 | RESIDUOS DE ADHESIVOS E SELADORES QUE CONTEÑEN DISOLVENTES ORGÁNICOS OU SUBSTANCIAS PERIGOSAS |
| CAP 08 | PO DE LIXADO |
| 12 01 09 | EMULSIÓNS E DISOLUCIÓNS DE MECANIZADO SEN HALÓXENOS |
| 13 01 10 | ACEITES MINERAIS NON CLORADOS DE MOTOR, DE TRANSMISIÓN MECÁNICA E LUBRICANTES |
| 14 06 02 | OUTROS DISOLVENTES E MESTURAS DE DISOLVENTES HALOXENADOS |
| 14 06 03 | OUTROS DISOLVENTES E MESTURAS DE DISOLVENTES |
| 15 01 10 | ENVASES QUE CONTEÑEN RESTOS DE SUBSTANCIAS PERIGOSAS OU ESTÁN CONTAMINADOS POR ELAS |
| 15 01 11 | ENVASES METÁLICOS, INCLUÍDOS OS RECIPIENTES A PRESIÓN BALEIROS, QUE CONTEÑEN UNHA MATRIZ POROSA SÓLIDA PERIGOSA |
| 15 02 02 | ABSORBENTES, MATERIAIS DE INFILTRACIÓN (INCLUÍDOS OS FILTROS NON ESPECIFICADOS NOUTRA CATEGORÍA), TRAPOS DE LIMPEZA E ROUPA PROTECTORA CONTAMINADA POR SUBSTANCIAS PERIGOSAS |
| 16 01 07 | FILTROS DE ACEITE |
| 16 01 13 | LÍQUIDOS DE FREO |
| 16 01 14 | ANTICONXELANTES QUE CONTEÑEN SUBSTANCIAS PERIGOSAS |
| 16 06 01 | BATERÍAS DE CHUMBO |
| 20 01 33 | BATERÍAS E ACUMULADORES ESPECIFICADOS NOS CÓDIGOS 16 06 01, 16 06 02 OU, 16 06 03, E BATERÍAS E ACUMULADORES SEN CLASIFICAR QUE CONTEÑEN ESAS BATERÍAS |
| CAP 18 | RESIDUOS DE LABORATORIO |
| 16 06 04 | PILAS ALCALINAS E SALINAS |

| | |
|---|-----------------------|
| - | LIXO INDUSTRIAL |
| - | AUGAS HIDROCARBURADAS |

Anexo II

Residuos non permitidos e non aceptados no Centro Verde

| CÓGIGO LER | RESÍDUOS NON ADMISÍBEIS |
|-----------------------|--------------------------------|
| - | RESIDUOS URBANOS ORGÁNICOS |
| - | MATERIAIS RADIATIVOS |
| - | MATERIAIS EXPLOSIVOS |

| | |
|---|---|
| – | MATERAIS INFLAMÁBEIS |
| – | RESIDUOS INFECCIOSOS |
| – | RESIDUOS BIOSANITARIOS E/OU CITOLÓXICOS |
| – | RECIPIENTES VOLUMINOSOS QUE CONTIVERAN MATERIAIS TÓXICOS OU PERIGOSOS |
| – | MEDICAMENTOS |
| – | RESIDUOS SEN SEGREGAR |
| – | RESIDUOS SEN IDENTIFICAR |
| – | RESIDUOS NON ESPECIFICADOS NA LISTAXE DE ADMISÍBEIS |

2º.- Someter o presente expediente e o acordo de aprobación inicial ao trámite de información pública, por un prazo de trinta (30) días hábiles, mediante a inserción de anuncios no BOP de Ourense e na sede electrónica da Deputación, de conformidade co previsto no artigo 49 da Lei 7/1985. Durante o dito prazo, as persoas interesadas poderán formular as reclamacións que consideren oportunas, as cales deberán ser resoltas polo pleno da Corporación Provincial, a través de acordo de aprobación definitiva. No caso de que non se formulasen reclamacións en prazo, o acordo de aprobación inicial elevarase a definitivo, sen necesidade de acordo plenario expreso.

3º.- ORDENANZA REGULADORA DA PRESTACIÓN PATRIMONIAL DE CARÁCTER PÚBLICO NON TRIBUTARIA POLO SERVIZO PÚBLICO SUPRAMUNICIPAL DE RECOLLIDA E RECEPCIÓN DE RESIDUOS INDUSTRIAIS NON PERIGOSOS E ESPECIAIS

D.^a Marta Nóvoa Iglesias, do Grupo Popular, fai referencia á Ordenanza reguladora da prestación patrimonial de carácter público non tributaria polo servizo público supramunicipal de recollida e recepción de residuos industriais non perigosos e especiais. Recolle os importes segundo o tipo de materiais a tratar, e o custo por tonelada, en función dos que son máis sinxelos de xestionar ou máis complicados son máis caros (pinturas, vernices). A maioría de empresas grandes teñen xestor de residuos, pero moitas pequenas empresas non teñen xestor de residuos, e esta é unha boa medida para non chamar a unha empresa e os nosos custos son inferiores aos dunha empresa de xestión de residuos. Considera que esta é unha boa medida.

O Sr. presidente indica que este centro longamente demandado, foi construído na época do bipartito, e a nosa idea é poñelo a funcionar. Os documentos de custos son de carácter técnico e foron elaborados por eles, e se hai algunha anomalía se corraxirán, e o que nos move é resolver un problema medioambiental e de funcionamento das empresas. Os grandes teñen

xestores e os pequenos non, e acaban votando nos contedores municipais é un problema para o funcionamento do servizo e para os concellos.

Non se producen máis intervencións e co voto favorable do Grupo Popular (6) e de DO (2) e a reserva de voto do Grupo Socialista (4) e do BNG (2), a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente a Ordenanza reguladora da prestación patrimonial de carácter público non tributaria polo servizo público supramunicipal de recollida e recepción de residuos industriais non perigosos e especiais, co seguinte contido:

Artigo 1. Fundamento e natureza

En uso das facultades concedidas polos artigos 133.2 e 142 da Constitución, esta Deputación Provincial establece a prestación patrimonial de carácter público non tributario como contra prestación polo servizo público supramunicipal de recollida e tratamento de residuos industriais non perigosos e especiais, que se rexerá pola presente ordenanza reguladora de prezos públicos.

Todo iso en aplicación do establecido polo novo apartado 6 do artigo 20 do texto refundido da Lei reguladora das facendas locais (TRLFL), na redacción aprobada para este novo apartado 6 pola disposición final duodécima da Lei 9/2017, do 8 de novembro, de contratos do sector público (LCSP), cuxa entrada en vigor produciuse o 9 de marzo do ano 2018.

O anterior, en concordancia co establecido polas disposición adicional cuadraxésimo terceira da citada Lei de contratos do sector público, e pola disposición adicional primeira da Lei 58/2003, do 17 de decembro, xeral tributaria (LXT) na redacción aprobada para a mesma pola disposición final undécima da citada Lei 9/2017, de contratos do sector público.

Artigo 2. Ámbito de aplicación

Os prezos regulados nesta ordenanza constitúen prestacións patrimoniais de carácter público non tributario que se satisfarán polos usuarios que, de xeito voluntario, soliciten o servizo de recollida, recepción e tratamento de residuos industriais non perigosos e especiais no centro verde, sito na rúa núm. 4 do Polígono Industrial de San Cibrao das Viñas (San Cibrao das Viñas - Ourense).

O ámbito territorial de aplicación desta ordenanza é para os residuos industriais non perigosos e especiais, de industrias ou actividades localizadas na provincia de Ourense, incluíndo dúas áreas principais:

- A primeira, denominada como “zona prioritaria”, abarcando o Polígono Industrial de San Cibrao, o Parque Empresarial de O Pereiro de Aguiar e a Zona Comercial Barreiros.
- A segunda, nomeada como “zona non prioritaria”, para todas aquelas zonas territoriais que estean fóra da primeira, como por exemplo as que se sitúan noutras zonas do municipio de San Cibrao das Viñas ou aquelas próximas á zona industrial de Seixalbo (no municipio de Ourense), incluso nos arredores da cidade de Ourense.

Artigo 3. Feito imponible

1. Constitúe o feito imponible desta prestación patrimonial:
 - A recepción no centro verde de residuos de orixe industrial de tipo non perigoso ou especial producidos nos municipios da provincia de Ourense.
 - A recollida e recepción “porta a porta” por persoal autorizado do servizo, nas industrias e empresas situadas na provincia de Ourense, dos residuos industriais non perigosos ou especiais que se orixinen pola actividade industrial ou empresarial.

Artigo 4. Obrigadas ao pago

Estarán obrigadas ao pago da prestación patrimonial de carácter público non tributario, en concepto de obrigada principal e directa, as persoas físicas ou xurídicas, privadas ou públicas, que fagan uso da prestación do servizo público supramunicipal de recollida, recepción e tratamento de residuos industriais non perigosos e especiais dentro do termo provincial, conforme establece o artigo 43 da Lei reguladora das facendas locais.

Artigo 5. Responsables

Responderán solidaria ou subsidiariamente das obrigacións tributarias do suxeito pasivo, as persoas físicas ou xurídicas ás que se refiren os artigos 41 a 43 da Lei 58/2003, do 17 de decembro, xeral tributaria.

En concreto, responderá solidariamente, como substituto da obrigada tributaria, o transportista que entrega o residuo nas instalacións do centro verde do Polígono de San Cibrao ou os

administradores ou integrantes da administración concursal e liquidadores de quebras das sociedades, co alcance que sinala o artigo 40 da Lei xeral tributaria.

Artigo 6. Cota tributaria

Establécese que a cobranza das prestacións patrimoniais de carácter non tributario se realice mediante o réxime de tarifas para cada tipo de servizo e residuo industrial non perigoso ou especial permitido na ordenanza, segundo se establece a continuación:

1. CUADRO DE TARIFAS PARA A RECEPCIÓN DO RESIDUO:

| CÓDIGO LER | RESIDUOS INDUSTRIAIS NON PERIGOSOS | CUSTO (€/t) |
|------------|------------------------------------|-------------|
| 20 01 38 | MADEIRAS | 7,00 €/t |
| 20 01 01 | PAPEL | 8,80 €/t |
| 20 01 01 | CARTÓN | 8,80 €/t |
| 20 01 40 | CHATARRA | 110,00 €/t |
| 20 01 11 | TEAS | 5,00 €/t |
| 20 01 39 | PLÁSTICOS | 50,00 €/t |
| 20 01 99 | OUTROS | 10,00 €/t |
| 17 04 02 | ALUMINIO | 625,00 €/t |
| varios | LODOS | 380,00 €/t |
| - | PALETS | 0,38 €/t |
| - | EMBALAXES DE CARÁCTER INDUSTRIAL | 50,00 €/t |
| 20 01 02 | VIDRO | 27,00 €/t |
| 10 01 | CINZAS | 40,00 €/t |

| CÓDIGO LER | RESIDUOS INDUSTRIAIS DE CARÁCTER ESPECIAL | TARIFA (€/t) |
|------------|---|--------------|
| | SUBTIPO | |
| 080111 | PINTURAS Y VERNICES | 410,00 €/t |
| 08 03 12 | TINTAS CON DISOLVENTE OU SUBSTANCIAS PERIGOSAS | 410,00 €/t |
| 08 03 17 | RESIDUOS DE TÓNER DE IMPRESIÓN | 90,00 €/t |
| 08 04 09 | RESIDUOS DE ADHESIVOS E SELADORES QUE CONTEÑEN DISOLVENTES ORGÁNICOS OU SUBSTANCIAS PERIGOSAS | 350,00 €/t |
| CAP 08 | PO DE LIXADO | 180,00 €/t |
| 12 01 09 | EMULSIÓNS E DISOLUCIÓNS DE MECANIZADO SEN HALÓXENOS | 200,00 €/t |
| 13 01 10 | ACEITES MINERAIS NON CLORADOS DE MOTOR, DE TRANSMISIÓN MECÁNICA E LUBRICANTES | 0,00 €/t |

| | | |
|----------|--|--------------|
| 14 06 02 | OUTROS DISOLVENTES E MESTURAS DE DISOLVENTES HALOXENADOS | 900,00 €/t |
| 14 06 03 | OUTROS DISOLVENTES E MESTURAS DE DISOLVENTES | 900,00 €/t |
| 15 01 10 | ENVASES QUE CONTEÑEN RESTOS DE SUBSTANCIAS PERIGOSAS OU ESTÁN CONTAMINADOS POR ELAS | 250,00 €/t |
| 15 01 11 | ENVASES METÁLICOS, INCLUÍDOS OS RECIPIENTES A PRESIÓN BALEIROS, QUE CONTEÑEN UNHA MATRIZ POROSA SÓLIDA PERIGOSA | 250,00 €/t |
| 15 02 02 | ABSORBENTES, MATERIAIS DE INFILTRACIÓN (INCLUÍDOS OS FILTROS NON ESPECIFICADOS NOOUTRA CATEGORÍA), TRAJOS DE LIMPEZA E OUPA PROTECTORA CONTAMINADA POR SUBSTANCIAS PERIGOSAS | 300,00 €/t |
| 16 01 07 | FILTROS DE ACEITE | 0,00 €/t |
| 16 01 13 | LÍQUIDOS DE FREO | 150,00 €/t |
| 16 01 14 | ANTICONXELANTES QUE CONTEÑEN SUBSTANCIAS PERIGOSAS | 240,00 €/t |
| 16 06 01 | BATERÍAS DE CHUMBO | 450,00 €/t |
| 20 01 33 | BATERÍAS E ACUMULADORES ESPECIFICADOS NOS CÓDIGOS 16 06 01, 16 06 02 OU, 16 06 03, E BATERÍAS E ACUMULADORES SEN CLASIFICAR QUE CONTEÑEN ESAS BATERÍAS | 0,00 €/t |
| CAP 18 | RESIDUOS DE LABORATORIO | 2.700,00 €/t |
| 16 06 04 | PILAS ALCALINAS E SALINAS | 30,00 €/t |
| – | LIXO INDUSTRIAL | 130,00 €/t |
| – | AUGAS HIDROCARBURADAS | 220,00 €/t |

2. TARIFAS PARA O SERVIZO DE RECOLLIDA PORTA A PORTA

Establécese para o servizo de recollida unha tarifa de 1,32 €/km para a zona prioritaria e de 1,58 €/Km para a zona non prioritaria.

Artigo 7. Revisión de tarifas

Establécese a seguinte fórmula de revisión de custos: $P_t = K_t * P_o$

Onde:

- P_t : Orzamento de execución material revisado.
- P_o : Orzamento de execución material no mes e ano de adxudicación do contrato
- K_t é o coeficiente de revisión resultante da aplicación da seguinte fórmula:

$$- K_T = 0,4784 \cdot \frac{S_t}{S_0} + 0,0179 \cdot \frac{L_t}{L_0} + +0.0602 \cdot \frac{X_t}{X_0} + 0.443$$

Onde:

- **S:** Variación salarial media pactada, a nivel estatal, para o sector de “Recollida, tratamento, eliminación de residuos e valorización”, publicada polo Ministerio de Traballo e Economía Social.
(O valor a aplicar nunca será superior ao das actualizacións do custo da man de obra no sector público aprobado nos Orzamentos Xerais do Estado).
- **L:** Variación a nivel estatal do índice da clase "combustibles e lubricantes para vehículos persoais" publicado polo Instituto Nacional de Estadística (INE).
- **X:** Prezo medio aritmético de España (€/MWh), publicado polo Operador do Mercado Ibérico da Enerxía,-OMIE-.
- Subíndices **t** e **0**: momento da revisión do contrato e momento da súa formulación respectivamente.

Artigo 8. Pagamento da prestación patrimonial

A obrigación de pago do prezo público regulado nesta ordenanza nace desde que se presta o servizo especificado no feito imponible.

A prestación patrimonial devéñase cando se solicita a prestación do servizo.

O pago das tarifas efectuarase no lugar e forma que designe o adxudicatario do servizo e efectuarase o abono do prezo, no momento da entrega do residuo nas instalacións do servizo público supramunicipal, sito no centro verde do Polígono de San Cibrao das Viñas ou cando se realice a recollida “porta a porta” dos residuos.

Artigo 9. Infraccións e sancións tributarias

En todo o relativo á cualificación das infraccións tributarias, así como á determinación das sancións que polas mesmas correspondan en cada caso, aplicaranse os preceptos de contidos nos artigos 178 e ss. da Lei 58/2003, do 17 de decembro, xeral tributaria, e demais normativa que a desenvolva.

Disposición Adicional.

Dado que o réxime xurídico substantivo básico aplicable á figura das “prestacións patrimoniais de carácter público non tributario” actualmente establecido con carácter xeral na

disposición adicional primeira da Lei 58/2003, do 17 de decembro, xeral tributaria, e con carácter específico para as entidades locais, no novo apartado 6 do artigo 20 do TRLFL, non foi aínda desenvolvido de xeito normativo polo lexislador estatal, mentres non sexa levada a cabo esta regulación normativa de desenvolvemento, e no non disposto expresamente pola presente ordenanza reguladora, serán de aplicación supletoria á prestación patrimonial de carácter público regulada na mesma, as determinacións sobre implantación, xestión, inspección, recadación e revisión en vía administrativa establecidas para taxas polos mencionados textos legais.

Disposición Final. Aprobación, entrada en vigor e derogación da ordenanza

Esta ordenanza entrará en vigor e será de aplicación tras a súa publicación no Boletín Oficial da Provincia, permanecendo en vigor mentres non se acorde a modificación ou derogación expresa da antedita.

2º.- Someter o presente expediente e o acordo de aprobación inicial ao trámite de información pública, por un prazo de trinta (30) días hábiles, mediante a inserción de anuncios no BOP de Ourense e na sede electrónica da Deputación, de conformidade co previsto no artigo 49 da Lei 7/1985. Durante o dito prazo, as persoas interesadas poderán formular as reclamacións que consideren oportunas, as cales deberán ser resoltas polo pleno da Corporación Provincial, a través de acordo de aprobación definitiva. No caso de que non se formulasen reclamacións en prazo, o acordo de aprobación inicial elevarase a definitivo, sen necesidade de acordo plenario expreso.

4º.- MOCIÓN DO BNG RELATIVA Á TRAMITACIÓN DA CENTRAL HIDROELÉCTRICA REVERSIBLE CASTRELO DE MIÑO NOS CONCELLOS DE CASTRELO DE MIÑO, A ARNOIA E CARTELLE, PROMOVIDA POLA EMPRESA SAN ISIDRO SOLAR 3 SL E ÁS ACTUACIÓNS QUE DEBE LEVAR A CABO ESTA INSTITUCIÓN PARA PROTEXER OS INTERESES MEDIOAMBIENTAIS, SOCIAIS E ECONÓMICOS DOS GALEGOS E GALEGAS CO CONTROL PÚBLICO DOS RECURSOS NATURAIS DE GALIZA.

D.^a María José Mangana Guede, do BNG, indica que en Galicia a provincia de Ourense historicamente foi maltratada no hídrico e nos eólicos, e xa trouxo a esta Comisión unha pregunta sobre esta central reversible, e quere transmitir unha petición de veciños, comuneiros e negocios dos concellos de Castrelo de Miño, A Arnoia e Cartelle. Engade que Galicia e

Ourense son una zona moi afectada polas enerxías renovables, que hai que facelas e utilizadas pero temos o cupo cheo. Na época do fascismo se fixeron encoros sen contar para nada coa poboación, sen contar cos veciños, esnaquizando terras, vivendas, patrimonio, causouse un impacto ambiental moi grande, e iso nunca se reverteu na sociedade e no rural galego. As empresas hidroeléctricas seguen gañando moitos cartos, e nos seguimos perdendo, xa que tributan en Madrid especialmente, e nós non recibimos nada a cambio. Na moción constan datos de produción de enerxía en Galicia e Ourense, pero damos moito máis do que recibimos. Di que o BNG pide unha tarefa eléctrica galega. Exportamos moita enerxía e non recuperamos nada. Esta balsa reversible, que é de bombeo e turbina, se crea na zona máis alta do encoro, e está á espera de ser informado o alcance de estudo de impacto ambiental. Esa balsa bombeará a auga para a época de secas ou haxa que producir enerxía, pero se pode facer cando é máis deficitaria ou cando é máis cara, dependendo do interese da empresa. Indica que lles preocupa que esta balsa implica obras, novas vías, movementos subterráneos, de terras, abnegar terras e algunha casa. O proxecto fala dun tramo de 2 km, pero vai ter danos ao redor, e para evitar problemas como pasou en Larouco, se non fora pola oposición da veciñanza, no que non teríamos hoxe o concurso de parapente, obra na que participa a Deputación. Trátase de parar este proxecto ou conducilo a un impacto non ambiental. A continuación dá lectura ao contido da moción.

D. Armando Ojea Bouzo, de DO, di que reserva o voto para o Pleno.

D. Aurentino Alonso Araújo, do Grupo Socialista, indica que tamén reservan o voto para o Pleno. Indica que seu pai naceu a un 1,3 km. de onde vai ir a balsa, e o Coto de Novelle non está incluído en ningunha figura de protección, pero debería estar protexido. É unha balsa, tamén chamada pila hidráulica, e segundo os datos do documento previo á redacción do proxecto de 40 m/s de evacuación de auga, terá 1,3 hm³, equivale ao embalse que existe en Vilamartín, e en 9 horas balerairíase. Engade que tamén deberíamos ter en conta a fauna, medio ambiente... En todo caso considera que en Galicia sufrimos estas instalacións e deberíamos recibir máis do que recibimos.

D.^a Patricia Torres Madureira, do Grupo Popular, indica que están buscando información cos axentes implicados para dar unha resposta á moción. Desexa destacar que estarán ao lado dos veciños e dos alcaldes que representan a estes concellos que se nomean na moción. Se reservan o voto para o Pleno.

D.^a María José Mangana Guede, do BNG, indica que non quixo entrar en cuestións e debates técnicos que non conducen a nada. Si ten claro que haberá impacto ambiental como nos eólicos ou nas centrais hidroeléctricas. Producimos moita enerxía de cara ao Estado español. Pide que se protexa a fauna, flora, a biodiversidade, o noso patrimonio, e que nos expliquen ben o que vai pasar con este proxecto.

D. Armando Ojea Bouzo, de DO, considera que se deben analizar os impactos do proxecto e buscarán información e decidirán en consecuencia.

D. Aurentino Alonso Araújo, do Grupo Socialista, indica que achegou eses datos para que nos demos unha idea da magnitude da obra.

O Sr. presidente, di que se reservan o voto porque é un tema complexo. Nós non temos ningún interese en prexudicar a ninguén. Son tres concellos gobernados por alcaldes do noso grupo político. Xa se fixeron reunións cos veciños e nas que participaron todos os grupos políticos e o noso grupo defende os intereses dos veciños, o que digan os alcaldes e os veciños, non teñen ningún outro interese. Sobre a política enerxética da Xunta de Galicia cada un ten a súa postura.

Non se producen máis intervencións e co voto favorable do BNG (2) e a reserva de voto do Grupo Popular (6), do Grupo Socialista (4) e de DO (2), a comisión ditamina favorablemente a adopción, por parte do Pleno, do seguinte acordo:

1º.- Instar aos concellos de Castrelo de Miño, Cartelle e A Arnoia e á Deputación de Ourense a facer pública e comunicarlle á veciñanza cal foi a posición que estas institucións lle trasladaron ao MITECO a respecto do proxecto de Central Hidráulica Reversible na fase potestativa, na que estas institucións se tiñan que pronunciar e que a veciñanza pediu que se paralizase xa nesta fase.

2º.- Demandar do goberno central que rexeite a elaboración do documento de determinación do alcance do estudo de impacto ambiental da central hidroeléctrica reversible Castrelo de Miño nos concellos de Castrelo de Miño, A Arnoia e Cartelle promovida pola empresa San Isidro Solar 3 SL, para protexer os intereses dos galegos e galegas ante o prexuízo ambiental, económico e social que tería.

3º.- Instar á Xunta de Galiza a aposta por un novo modelo enerxético galego a partir da elaboración dun mapa de necesidades e ordenación enerxética onde se planifique que tecnoloxías precisamos e as súas posibles localizacións e que se someta esta planificación a

unha avaliación ambiental estratéxica para ter as máximas garantías de protección medioambiental.

4º.- Instar á Xunta de Galiza a asumir as máximas competencias en materia de enerxía que lle outorga o Estatuto de Autonomía de 1981.

5º.- Instar á Xunta de Galiza a que demande as debidas competencias para que Galiza xestione directamente os seu ríos e bacías, co fin último de evitar que empresas eléctricas comprometan os intereses ambientais, económicos e sociais do País e exploten os nosos recursos naturais de costas os intereses das galegas e galegos.

6º.- Instar á Deputación Provincial de Ourense a remitir as alegacións necesarias e desenvolver cantas actuacións sexan precisas para a paralización do proxecto de central hidroeléctrica reversible e da megabalsa do coto Novelle.

5º.- MOCIÓNS DE URXENCIA.- Non se presentan.

6º.- ROGOS E PREGUNTAS.- Nesta quenda prodúcense as seguintes intervencións:

D. Xosé Manuel Puga González, do BNG, fai un rogo. O 4 de setembro o seu grupo pediu un informe sobre a presenza do gas radon na provincia de Ourense. Contestáronlle o día 11 que podía pasar calquera do grupo provincial para a súa consulta en Transparencia da Deputación, pero non se lles deu copia, senón que puideron consultar o informe e tomar notas. Roga que, tendo en conta a especificidade deste informe realizado pola Universidade, se traslade por escrito para dalo a coñecer. Piden que se traslade por escrito para os que teñan interese poidan coñecer a incidencia do gas radon na súa comarca ou no seu concello.

D.^a María José Mangana Guede, do BNG, di que o balneario de Baños de Molgas está pechado dende abril-maio deste ano. O anterior presidente da Deputación, o Sr. Baltar, comprometeuse a mirar polo balneario de Baños de Molgas. Actualmente está pechado e en concurso de acredores. Pregunta se a Deputación ten algún plan o proxecto para este balneario xa que se prometeu axudar e recuperalo.

O Sr. presidente, responde que lle parece lóxico axudar a calquera institución ou empresa e máis se está relacionada cun elemento tan singular como é o termalismo en Ourense. Agora mesmo non ten ningunha petición da empresa desde que está el. É un ente privado, pero se está en concurso de acredores entendemos que primeiro terán que resolver iso, e veremos como queda e quen é o titular. Indica que o apoio ao termalismo é unha prioridade, e sobre

todo nun balneario histórico como é o de Baños de Molgas, polo tanto a predisposición de este grupo será o apoio.

E, ás 17.41 horas, dáse por finalizada a reunión, redactándose a presente acta que se asinará electronicamente. Dou fe.